

嘉慶松江府志

松江府志卷六十三

方外傳

宋紹熙雲間志列仙梵者四人世傳唐惠旻在貞觀初爲普照開山祖已佚而不書知當時脫漏者多矣茲本舊志所登次第採補船子釣灘葛翁仙井不妨備載而月麓無凡蟾陽子諸人亦不別爲表出亦見彼教中固大有人在佛果仙宗未嘗不以忠孝爲本也志方外

宋釋

杯渡者不知姓名常乘木杯渡水人以是呼之宋元嘉初

在冀州不修細行居止無定神異屢著東遊吳郡向釣者乞魚施一飯者渡手弄反覆投水卽活又向網師乞魚網者嗔罵渡拾兩石子擲水中俄而兩水牛鬪網亦破碎遊行松江仰杯水中乘而渡岸繼涉剡中登天台數月而返後莫知所之識者謂羅漢應真也

神僧傳

唐

惠旻字元素河東人九歲出家從竹園志律師稟承十誦文理精通止吳之通元寺結徒礪業十七年不出寺門隋末饑饉守死不移禪誦無輟刺史李廉薛通王榮等送入華亭簪山立寺行道數年後於南澗止一草庵兩

免一彪相依止宿所著有十誦私記十三卷僧尼行事
二卷尼衆羯摩兩卷道俗菩薩戒義四卷貞觀末年示

寂

續高僧傳

道欽蘇州崑山朱氏子初業儒年二十八遇潤州鶴林素
禪師勉之薙落乃戒之曰乘流而行遇徑卽止天寶三
載抵臨安東北一山樵者曰此徑山也乃駐錫焉山有
龍淵龍現身爲人獻其地於師乃成伽藍大曆三年詔
至闕下賜號國一禪師後辭歸貞元八年十二月示疾
說法而逝賜諡大覺禪師

傳燈錄

霄韻駐錫松江飄然塵外閒以詞翰游戲三昧劉禹錫贈

其游天台詩云曲江僧向松江見又過天台看石橋鶴

戀故巢雲戀岫比君猶是不逍遙

陳志

德誠入藥山洪道禪師室大明宗旨與道吾雲巖爲道契
自離藥山小舟往來松江朱涇以綸釣度日人號爲船
子和尙時夾山善會禪師住京口鶴林寺道吾知其所
得尙淺令往參船子和尙會造朱涇見誠大契宗旨辭
行再四顧誠喚會回立起橈曰汝將謂別有那廼覆舟
而逝唐咸通十年僧藏暉卽其覆舟處建寺焉

雲開志引傳燈

錄顯志誠有機緣集內撥掉歌
三十九首呂益柔爲序而刻之

藏奐姓朱氏蘇州華亭人也母方娠及誕嘗聞異香未冠

禮道曠禪師出家詣嵩岳受具戒再詣五洩山入靈默
大師室參授道要唐大中十二年洛下修長壽寺敕與
居焉明年歸姑蘇再住明州棲心寺所在禪者雲集凡
入師室者疑難冰釋咸通七年示寂葬于天童山其徒
以行狀詣闕請謚賜號心鑑塔曰壽相

雲間志引
高僧傳

如海唐乾符間築臺中泐作井施湯茗建塔標燈爲往來

之望

俞汝爲柳塔記
引吳天澤記

宋

永明智覺禪師名延壽餘杭王氏子總角之歲歸心沸乘
持法華經七行俱下年二十八爲華亭鎮將志慕眞乘

吳越文穆王知師在道乃從其志謁天台韶國師一見而深器之謂曰汝與元帥有緣他日大興佛事忠懿王時居永明寺十五載度弟子一千七百人著宗鏡錄一百卷開寶八年示寂

稽古略

聰道人姓仰氏名德聰初受具戒于梵天寺參請諸方密契心印太平興國三年結廬於柰山之東峯有二虎大青小青爲侍有造之者見挂一書梁間問之曰此佛經也問嘗讀否曰如人看家書一遍旣知其義何再讀爲嘗曰古人貴行吾何言哉其他問者皆默然不對天禧元年七月趺坐而逝閱月容貌如生

雲間志引
靈鑒塔銘

喜蟾入天台韶國師室太平興國中主千山禪居寺人多
歸之精舍始備朝廷賜蟾師號曰崇惠明教治平中賜

圓智寺額

雲間志

暢法華閩人姓陳氏出家名會暢日誦法華經三十年不
輟故人呼爲暢法華或體羸氣劣不擇酒肉康寧則曰
佛制枝葉花果不許入口嘗夢登一閣有異人指之曰
此兜率宮也師壽七十五當來居此暢曰我願得八十
歲誦經滿二萬部異人無語祥符中示寂果八十矣閩
維時舍利五色瑩然煙燄中

願志

長水法師名子璿秀州華亭人有道行注華嚴經八十一

卷過精嚴寺講楞嚴經自作疏曾夢文殊入口疏成紙
爲之貴錢易奏賜號楞嚴大師後跣趺示寂以兩甕合
之葬真如寺後烏珠兵至發之見手爪遶身復瘞之而

去

陳志參佛
福通載

惟正字煥然華亭黃氏子五歲見佛書能指識其字纔讀
則朗然成誦逮冠入杭之北山從資聖本如肄業參天
台徑山蔣侍郎堂守錢塘與師爲方外交愛跨黃牛以
軍持挂角上人目爲正黃牛皇祐元年四月佛日忽語
衆云夫動以靜對未始有極吾一動六十有四年今靜
矣然動靜本何有哉語旣而瞑正工書能詩著有緣溪

集其山井偈曰橋上山萬重橋下水千里惟有白鷺爲

見我常來此爲世傳誦

願志參朱詩紀事

慧辯字納翁賜號海月華亭傅氏子生時有異父母令入

普照出家得法於天竺明智智命代講八年遂領寺事

坡公倅杭時與師爲方外交熙寧六年七月十七日跌

坐示寂遺言須坡公至方可闔龕四日坡至見其端坐

如生頂尙溫遂爲三絕以哭之

願志參天竺事跡坡公詩欲尋遺跡強沾裳

本自無生可得亡今夜生公講堂月滿庭依舊冷如霜

生死猶如臂屈伸情鍾吾輩一酸辛樂天不是蓬萊

客憑仗西方作主人欲訪浮雲起滅因無緣卻

見夢中身安心好住王文度此理何須更問人

令出家後入道雙林覃思得度首謁神照復往依廣智
常白智曰師所從者我無疑焉若圓頓絕待之旨當須
自得後敷講于雲間超果寺大揚道化天台一宗振于
三吳自湛始熙寧六年三月跏坐而逝火浴之頃舍利

粲然

願志

妙悟大師希最湖州施氏子母感異夢而生出家受天台
教悉通奧義緇流愛而畏之號曰義虎治平中嘗講經
于青龍鎮隆平塔院後居勝果寺寺有鬼物爲祟師爲
講說于空中得朱書數十字自稱漢烈士沈光有自蒙
懺解已生他化之語元祐庚午季夏六日說法作偈而

逝

顧志引呂
益柔碑

靈照蘭谿盧氏子幼失怙恃依寶慧寺香巖湛師又依淨
覺師熙寧中主華亭超果每歲開淨土會道俗常二萬
人夢見觀音示曰淨土不遠有願卽生一日謂侍者曰
吾往生有期矣面西跌坐而化塔院之東南隅

顧志

文照大師名銓善鼓琴有古琴曰響泉居普照閉戶絕交
第挹好風良月焚香撫弄云以供佛鄰貴慕之隔牆作
亭宵須以聽師知之徙于北牖元祐間獨與主簿劉發
厚善發嘗邀一客同見師師方操縵爲泛聲客遽稱善
師卽止客不懌去師顧曰何得引俗人入我座也發愧

謝師所居閣曰妙音

顧志

端師子吳興人始見弄師子者發明心要因以爲號住西
奈山嗣翠峯月禪師好漁父詞月夕必歌之高郵秦觀
聞其道高請升座于廣慧端以手自指曰天上無雙月
人間只一僧一堂風冷淡千古意分明少游首肯之端
吐語奇怪自知去期東吳祠之以爲散聖

陳志

鰕子和尙名智儼居靜安寺七月十五日胥村人來寺請
齋因同船去儼見捕鰕者從買一斗索水噉之曰齋回
還汝錢至齋家不請上座令席地一飯而無襯錢漁者
索錢曰無錢還我鰕儼徐曰還汝復索水飲隨吐出活

鰕盈斗人皆以爲異名鰕子和尙將示疾斂蒲草爲萬
餘繩懸諸廊廡曰吾將作大緣事繼卽坐蛻人競施以
錢懸繩皆滿遂以建佛閣今靜安寺猶稱鰕子道場顧志
淨梵華亭人姓笄氏母夢佛光而生十歲依勝果寺祝髮
大觀中結二十七僧修法華懺感普賢授羯摩法呼淨
梵比丘名聲如撞鐘時長洲令王公度目擊其事題石
爲記姑蘇守應公有婢被祟請梵授戒妖卽滅葛氏請
薦夫見夫繞梵三匝而去化後茶毘有五色舍利郭志
妙普號性空自號桃花庵主漢州人久依黃龍死心抵華
亭追船子遺風結廬青龍之野以鐵笛自娛建炎初徐

明叛道經烏鎮民皆逃亡普獨荷策而往賊怒欲斬之
普詞色不撓賊駭異稽首謝過烏鎮得免於焚紹興庚
申書寄雪竇持禪師曰吾將水葬矣王戍持至見其尙
存作偈嘲之普笑曰待兄來作證明耳遂乘木盆于青
龍江順流入海唱曰船子當年返故鄉沒蹤跡處妙難
量眞風遍寄知音者鐵笛橫吹作散場以笛擲空而沒
後三日於沙上趺坐如生迎歸閣維舍利無數二鶴徘徊
空際火盡始去衆建塔於青龍

陳志

妙覺俗姓朱華亭人在家祝髮苦行持修背後涅心經字
深入膚理年六十餘忽沐浴更衣別鄰里謂其子曰我

將去矣在常州白家某房某月日託生汝可來問遂坐而瞑後其子往覓果是日生一男背見心經字

陳志

可觀字宜翁別號竹庵華亭戚氏子年十二祝髮邑之寶雲寺十六進具戒得法於車溪卿法師建炎初主嘉禾壽聖後主當湖德藏居閱世堂乃曰松風山月此我無盡衣盍語言文字皆糠粃耳時大慧杲自徑山來訪對語終日歎曰教海老龍也乾道七年丞相魏杞請主北禪入院之辰適值重九指座云胸中一寸灰已冷頭上千莖雪未消老步只宜平地去不知何事又登高杞擊節不已後歸當湖竹庵淳熙九年無疾而逝壽九十有

一茶毘日舌根不壞烟所到處舍利無算塔於德藏所

著有楞嚴補注等書行於世

願志參佛祖通載

法寧密州李氏子住沂州馬嶠山淨居寺人稱曰馬嶠禪師紹興初航海抵青龍鎮有章衮母高氏夢天人曰古佛來也翼日迎師止錢氏園其地夜有光掘得碑云大唐禪寺福德橋下又得金剛佛象於是建寺尊奉焉後右丞朱諤迎主柰山昭慶而卒塔在方丈東

願志引覺岸稽古略

律師元瑋俗姓陳建谿宦族也以場屋困躋投華亭超果慧道師受具戒苦行三十年凡淨髮墮爪悉聚而歸諸先隴以見不敢毀傷之意道公命如杭習律於靈芝元

照律師所學既充迺於紹興甲寅卽華亭縣西訪得接
待舊址營建塔廟卽今圓覺寺及經坊浮圖是也一日
集弟子告曰我于死生去來照破既久聊爲諸君異日
佳話遂命設高座升之敷揚宗旨語訖而逝時紹興乙
亥二月癸未也

宋慶元劉百福延恩
寺律師行業記碑

碧雲名守祥華亭人賦性孤介五戒嚴持宋隆興中先建
功德司於合掌橋掌龍華會邇人莫初隆等懇請開山
延壽四衆歸向創十六觀堂與衆同修淨業德風益盛
遂成鉅刹大宏天台教觀至今祖堂塑像號爲碧雲尊

者願
志

明顛郡南薛塔人也俗姓薛氏佯狂若顛衣不蔽體人或遺之衣則轉以施人大雪中露脛跣足手持鐵釘遇瓦礫拾置袖中人與之誠語則答以機鋒或侮之則酬以狂語兒輩爭挽袖覓錢或與或不與飯于市探錢置几上酬直多寡不差倭奴見之羅拜云曾向海中失風遇此僧幸免嘗作菖蒲詩曰根下塵泥一點無性便泉石愛清孤當時不惹湘江恨葉葉如何有淚珠自寫頂相

傳於世

顧志

宗印字元實鹽官人竹庵之神足也解悟有氣骨歷遷德藏圓通超果北禪寺利海空英辭靈山舉以自代召對

便殿語簡理明賜號慧慶法師復行化至松江謂其徒
曰吾化緣畢此卽右脇安詳而寂時嘉定六年十二月
八日也藏龕慈雲塔旁

補續高僧傳

淨岳嘉定二年禮興聖寺僧若顏爲師從鑑堂義法師受
天台教觀出世說法前後凡七坐道場所至緇白向化
取宗門要典曰金剛鐸科分章段妙絕古今

顧志

淨眞出家師興聖寺僧若平嘉定六年參堂宗賢首教嘉
熙三年浙江錢塘江埭淨眞以偈呈安撫趙端明曰海
沸江河水接連民居衝蕩益憂煎投身直入龍宮去要
止驚濤浪拍天遂投于海三日而返謂衆曰我在龍宮

說法龍神聽受此塘不復崩矣語訖復入于海安撫聞

於朝敕賜護國眞法師祠于杭之會靈祠

顧志

月麓姓趙氏名孟僩宋宗室子也文天祥開闢江浙辟爲從事宋亡託身雲間北道堂爲黃冠名道淵又五年薙髮爲僧更名汝昌號月麓又號三教遺逸改北道堂爲本一禪院著詩文名湖山汗漫集臨沒端坐曰文山之客千古忠貞蓋至死不忘故宋也

顧志

元

明本號中峯錢塘人居天目山大暢宗風仁宗朝賜號廣慧禪師杖錫雲間棲泊泖上時趙孟僩出家北道堂禮

本座下延請說法因改北道堂爲本一禪院本所在結
茅皆名幻住因題其憩止曰幻住山房手書遺跡留院
中者甚多若皮袋子歌九字梅花詩水居十詠至今寶
藏之後歸天目示寂賜諡普應國師

陳志

子溫字仲言號曰觀又號知歸子郡人宋季元初萍浮四
方止杭之瑪瑙寺善草書喜畫蒲萄鬚梗枝葉皆草書
法也世號溫蒲萄時貴慕其畫贊金求之一筆不與逢
佳士揮灑無吝雅好著恢帽短衣囊錢果猖翔街陌探
囊投市中兒問識溫相公否由是進止輒擁羣兒謹呼
溫相公時有賓肖羅漢醉則維筆竿杪草聖芬媚詩人

遂有長竿醉草賓羅漢短褐伴狂溫相公之句性嗜酒

楊總統飲以酒則一不沾唇每見輒罵曰掘墳賊

願志

溫曰觀自題畫送友人歸故里詩松江府是我鄉州有愧平生欠一游子去扁舟泊煙渚相煩致意舊沙鷗

念常號梅屋華亭黃氏子母楊夢一僧龐眉雪髮因而有

娠至元壬午三月十二日誕于夜神光燭室既長風骨

秀異年十二出家受具戒至大戊申參晦機和尚于淨

慈言下有省住餘杭徑山嘉興祥符赴京之五臺後主

蘇州萬壽法席成佛祖通載二十二卷虞道園爲之序

寶洲謂理明事實出入經典有補于名教也

補續高僧傳

元智出家朱涇法忍寺皇慶三年開山東林寺延祐中詣

都進銅佛象時亢旱奉敕祈雨剋期果應賜號佛日普
照大德禪師及金襴伽黎歸寺闡揚宗教遐邇嚮慕延
祐七年辭世迄今塑像奉祠焉

願志

得喜姓錢氏出家興聖寺登天目山叩中峯禪師獲宗旨
歸有施北花園地遂結庵鑿池得古石刻錢喜二字中
峯因書喜見名其庵喜持鉢餉衆窮而無告者濟之死
無所歸者殯之人悉以喜菩薩稱之吳江程林仲喪母
喜爲演法有金甲神示見至順中卜遷盤龍塘不三年
遂成勝利及卒緇素送者數千人火後舍利晶瑩得之
者如獲至寶

願志

維則字天如吉州永新譚氏子依中峯本禪師於天目獅子巖至正初買地于蘇之東城因岡阜爲山名曰獅子林志得法之源也自中峯以來臨濟一宗化機局段爲之一變江浙名山屢請主席遂遁跡于松江九峯間十有二年著有楞嚴會解語錄別錄牘語若干卷

陳志參吳釋傳

覺岸字寶洲烏程吳氏子至元丙戌生七歲父歿母章教育之口授論語曲禮年十三禮郡之天寧普覺獨孤明禪師薙落受具法嗣淨慈晦機禪師泰定元年說法于松江南禪一日爲儒士劉澤民講楞嚴大義至七徵心忽瓶水騰躍注於其懷坐者驚愕覺岸笑曰此偶然耳

成稽古略行於世

顧志

敦元法師俗姓吳氏郡之亭林人年十七往湖州十山課

觀音經年二十獲明音辯當往京師安國寺受戒于徧

空法堂講次感天花下墜

至元嘉禾志

德林東甌人至正十二年禪坐上海之柘澤廢寺歲夏五

忽語人曰疇能施我一龕九月一日將此色身焚卻人

未之信至期空鉢囊易薪標自環趺坐合掌說偈竟火

從身起觀者始矍然膜拜曰活燒人云地里不祥林且

噴曰雨過卽無事

顧志

覺慶號壽堂姓毛氏鄞人弱歲禮壽梅峯爲師凡可以澤

物者靡不爲至正元年杖錫雲間觀普照佛會隆盛將以正月廿三日於會中坐化人皆止之有陳源堅者迎歸其家越二日復示衆云興來立到三更後徹骨寒來有幾人吾旣云辭世胡顏復留言訖而寂三日茶毘於西延恩徧體汗下復迎以歸是夕紅光燭天又十日顏貌如生鬚髮自長人皆嘆異源堅易所居爲庵髹慶身祠之至今存焉

願志

滋果字空林華亭人從徑山南楚悅資法要栖息郡之善應庵會本一禪院月公遷化推主院席南楚來院嘆曰融真俗於依正流聲光而攝度者公之謂也年七十餘

而化

華亭志

密古字太初號竹深俗姓錢華亭名族也壯歲棄妻妾出

家守戒行以詩名有集曰白雲謠

陳志

明

清澹號蘭江天台劉氏子嘗說法吳中緇素傾嚮後居天
界寺洪武初召對稱旨御製清澹說賜之晚憩郡之東
禪寺有望雲集及語錄毘盧正印皆梓行學士宋濂爲
之序

顧志

德然號唯庵華亭張氏子生具異相左足下有一痣口能
容拳舌可錫鼻七歲誦法華經於杭之天龍初參洪石

屋後參長于巖洪以緣在吳松爲書松隱二字遂來郡
南結庵以居嘗刺指血命僧道謙書華嚴經八十一卷
洪武初以高行僧薦尋還松隱建塔七級奉藏所書華
嚴經二十一年四月沐浴而化塔於松隱有船居詩十
首宋濂序

願志

原真字用藏姓朱氏上海人得度于華亭興聖寺傳天台
教觀洪武十八年微疾索浴書偈而化偈曰四十二年
無作無修有生有滅大海一漚真歸無歸心空淨遊
淨慧字古明松江人六武中詩僧書習虞永興其題天馬
圖云曾陪八駿崑崙頂肯逐羣雄草莽間殆亦有託而

逃于禪者

明人詩選

如泰華亭人乘一小舟四方參請洪武二十八年四月至
珍敬庵對衆自言我於初三日去也衆來送我至日以
所乘舟置陸地索浴更衣對佛說偈曰一枝紅燄起四
色藕花香遂入舟自焚

願志

紹宗字一原號遂初上海陳氏子年十三出家里之安國
寺得法于靜庵鎮法師洪武二十六年應召奏對稱旨
賜金縷伽黎擢右講經右善世三十年正月端坐而化
荼毘日會者數千人其徒奉舍利遺骨塔於安國寺

願志

志常號梅隱華亭朱氏子幼有出塵之志禮本一禪院僧

善實難度服勞執事及進具戒歷參南堂了庵西齋梵
石二大知識有得而歸遂繼師席延接雲水邑人嚮化
平居頌華嚴圓覺楞嚴等經以爲日課臨終諭衆勉力
進修合掌泊然而化

願志

善信號無疑嘉定吳氏子年二十九出家禮上海施水庵
僧智德爲師參請蘇城萬峯和尚建文三年年五十九
示微疾乃與衆云吾自出家以來脇不至席工夫今日
了當從此解脫索浴入龕於磬歌閒歛然火起自焚

願志

敬公七寶寺僧人呼爲敬講主平日誦經坐榻皆穿能詩

有青松集行世洪武中召天下高僧敬與焉

婁志

一如字一庵又號退翁上虞孫氏子年十三隸長慶寺爲僧洪武二十七年南洲治主大報恩寺師爲都講永樂初注法華經姚少師序之被召修大藏經授右闡教未幾示寂闔維舌本不壞其出世主松江崇慶寺則洪武十八年也

補續高僧傳

普智字無礙號一枝叟浙江臨平褚氏子出家天竺龍井寺依東溟曰法師授天台性具之學優于講說厯四大道場終于松江延慶平居禮誦寒暑不暫輟暮年專修淨業永樂七年正月會衆西向端坐而逝嘗集注彌陀

經願
志

道安字靜中華亭人朱姓出家興聖寺參松隱德然後領
唯命庵於松隱建浮圖七級造千佛象還興聖重修寶
塔建般舟三昧道場一期九十日永樂十五年作偈端
坐而逝年七十有七

陳志參補
續高僧傳

善啟字東白號曉庵長洲宦族楊氏子甫能言卽通佛典
父母異之命禮永茂院主爲浮屠屏跡龍山禪誦不輟
永樂七年主松郡延慶寺授副都綱召修永樂大典校
大藏經賜金縷伽黎服一時名流若沈粲錢溥皆與爲
方外交嘗論儒釋之辨曰且各爲其教又曰東魯垂道
西竺見性皆莫先于厚本故雖離父母而養生送死率

從厚與兄弟極友愛云正統八年示寂歸葬龍山溥志

其塔

願志

辨如海金澤頤浩寺僧禪行精嚴尤工詩正德中與錢修撰福結詩社嘗遊吳門與沈周唐寅輩倡酬年九十餘無疾端坐而逝

陳志

朱道人名松唐行鎮人嘉靖三十三年倭亂後始茹素持佛號曾于五臺山遇師得密語付屬歸冥修默坐不問生事一日有童子報以示寂之期在來年七月五日至明年正月詣柰山宣妙寺息緣面壁七月四日值道人誕辰緇白填委郡人周恩兼夏時訪之已不食三日矣

至晚沐浴趺坐明晨辰刻曰可矣令昇龕絕頂振衣登山迅速如飛入龕示寂舉手辭衆須臾舉火燎及鬚髮猶合掌云

陳志

白雲雍染南禪寺遇道者授定靜之法精虔有得後又遇之曰汝已小定矣非大定也此後仍向靜中求之常持陀羅尼咒一日瓶水湧沸尺餘以之療病輒愈人比之錢喜菩薩隆慶二年示寂著白雲心法周思兼序

陳志

慧才嚴氏子名塘號天育雲南楊林人已有室一日讀金剛偈有感禮永泉寺月空雍染四方參請未依徑山萬松禪師得受記荊嘗指金天示之因號西照陸文定樹

聲延主馬嶠寺隆慶四年端坐而逝塔于奈山時蒼山
禪師智空無著禪師善愛皆至郡中與才鼎立法席緇

白歸仰稱雲閒三禪

陳志

知明號無相崑山人出家長水塔院習禪定萬厯三年除
夕持戒沐浴留偈別僧跣趺而化尸留二十日啟龕視
之如生陸宗伯樹聲以下咸送之其徒心鏡益嚴戒行

御塔
記

性常號高峯雲南人薙染于伏牛山飛錫馬嶠寺與西照
蒼山無著往還參契周思兼訪之叩以宗旨曰除卻眼
前更無工夫親切處深爲心折請益者雲集後示寂寺

中至今奉爲宗主

陳志

異僧失其名萬厯二十三年從普陀來挂錫妙嚴寺日坐蒲團誦經佛座下忽生白蓮數莖踰八日方萎逾年坐龕中台掌向西和南者再遂瞑目吐火自焚

雙志

洪恩字懷三號雪浪金陵黃氏子事無極法師凡讀治世經書及內典利如奔馬全得法髓其示人直截根源不事枝葉嘗講經于小崑山聽者潯湧風靡本寺刻谷響集以記其盛弟子繼席者以千計著有雨花等集

雙志

株宏字佛慧號蓮池俗姓沈仁和諸生投西山性天理和尚視髮過東昌忽大悟遂建雲棲道場萬厯丁亥寓郡

之萬竹庵一時名流咸來聽法爲之灑然意消

金山志

真可字達觀號紫柏俗姓沈其先句曲人後居吳江年十七遇虎邱明覺禪師薙染至京師參徧融笑巖發明大事南歸以宗教並舉爲諸方大師復嘉興楞嚴寺刻大藏于徑山進隋淨琬所藏佛舍利慈聖太后迎之入宮中賜紫伽黎南還來泐塔攜慈聖所書尊勝經暨魚籃大士象送澄照院供養深夜跌坐遠近見神火隱隱出樹杪或繞塔院及去不復見後以妖書案連被逮說偈坐化于詔獄

陳志參
青浦志

昌易號雪庵四川銅梁人俗姓曾八歲爲僧下巫峽抵雲

閒住錫坐化庵已居馬嶧寺巡撫張公佳允亦銅梁人
行部松江者再曷匿跡不以聞張又于巴岳中構赤松
招隱二庵以待但報謝無他語張留京寓書招曷至天
界寺曷但云此皮囊何地不可遺恐老僧先歸公尙未
得歸也未幾示寂

陳志

淡齋僧每日白飯一盂不食鹽酪披一衲數十年寒暑不
易或供錢精受卽施之人問以經律曰吾知有佛一字
善一字此外無知若輩亦只須如此居超果寺數十年
一日語其徒曰我去矣取一浴具趺坐其中數令人灌
水氣若芷蘭一月灌畢合掌而化

陳志

張道人嘉興人髫年出家馬喙寺早晚課經外厨下執爨沿街拾字紙貯以竹筐投諸水火形體鰵瘦每取釜中餘瀝充腹曰精潔茶飯非薄福人所宜享也浙米必揀蟲蟻施放馴鳥繞而待哺焉衆稱之曰小菩薩萬曆二十三年坐化

郭志

智空字妙有滇南葛氏子生點蒼山之陽遂自號蒼山野衲年十三禮曹溪普通及長徧遊南岳匡廬東至徑山傳法萬松座下隆慶元年來松居超果寺陸文定徐文貞與爲方外友師授以楞嚴咒心及法界圖曰佛之宗旨盡在是矣師行苦而禮恭色和而語莊爲人祈禱無

不立應士庶咸德之萬厯丁丑示寂徐文貞爲塔銘

陳志

清源字雪泉華亭陸氏子七歲誦經誓願出家投北禪寺

坎峯榮禪師祝髮常持金剛般若至若見諸相非相卽見如來一時空洞覺習氣頓斷高峯天育兩禪師俱許爲法器徧參無極東巖辨融滄溟諸耆宿指示不二壽

六十餘而化

郭志

性一字覺虛江右安福人年十五辭父入九嶷山石溪庵依三際通禪師雍染受戒於無際受法於雪浪萬厯二十一年至華亭講楞嚴于本一禪院往少林爲無言禪師立碑還錢禪宗四家語錄移錫超果寺結西來堂休

老焉四十三年秋示寂塔于本堂之後

郭志

麻衣僧不知何許人萬厯中行遊至松江冬夏常披麻衣人以是呼之形狀頗異出語有奇驗善飲啖人召之雖在市肆或妓女雜坐談笑自若有伺其醉而誘之者酣臥三夕不醒乃舍去崇禎八年至善應庵端坐而化越三日顏色如生茶毘日獲舍利無算適有人從江北來遇于京口相與握手慰勞計其時卽蛻去之日也

郭志參董

舍三岡識略

梅谷禪師名含輝華亭人住徑山寂照庵能詩後至嘉興本覺寺三過堂看坡公贈文長老詩豁然有省而化

山徑

志

通洽字履三華亭超果寺僧參一雨汰如諸講席有詩名

明人
詩選

廣來號無從華亭人天啟初住餘杭大安禪寺興復殿宇
與諸名流結詩社著有徑山草一卷其禮紫柏大師塔
詩云雲龍風虎及時雄一種心肝絕不同佛祖頂門都
抹煞棒頭流血至今紅觀其詩語亦自不凡社中詩友
如斷峯念空兩僧俱華亭人

徑山
志

通燈字印林溧陽人俗姓司徒名輔聖天啟元年至松江
從了心和尙受戒尋祝髮雲棲法名大會住永思庵勤

修苦行崇禎初結永生庵於東郊刺血寫經後禮磬山
爲師改名通燈且告之曰不究心源終無益也須閉關
參悟後爲汝印證乃歸坐關三載一夕聞燈翦墜地聲
有悟再參磬山許爲法器尋入都祈請法藏時寫楞嚴
未竟于長椿寺成之中使見而驚異聲澈禁內遂賜藏
經及紫綠袈裟各一以還十四年五月跏趺而逝塔于

方山之陽

郭志

圓信號雪嶠寧波人與天童圓悟同得法于龍池正傳圓
悟法門甚盛傳衣者十二人圓信終身不付一弟子崇
禎癸未冬示寂雲門其自徑山來松先主柰山古浴堂

松江府志

卷六十三

三

繼遷頤浩寺風標孤峻瀟灑自如時目爲散聖禪云青浦志

行誠字無凡華亭人俗姓汝名應元字善長少讀書通翰墨有勇幹隸張肯堂麾下舟山破肯堂以二十七人死之應元已爲僧于補陀之茶山迺詣轅門求葬故主諸帥欲斬之有一帥憐其僧也語之曰汝不畏死耶曰願葬故主而死死不恨其帥迺曰吾今許汝葬葬畢來此曰諾乃歸斂張公并諸骨爲一大龕瘞之竟詣轅門諸帥皆驚乃命安置山中又訶知張公子茂滋羈鄣獄中曾有薦無凡通禪學得入帥府乘閒爲言茂滋忠臣裔

可矜且孺子不足慮遂詣當事求出茂滋不許請以身
代不許會鄞義士陸宇燦請以闔門保之閩中劉鳳翥
亦爲言之茂滋得出無凡又爲力請得放歸華亭數年
茂滋病卒無凡守墓終身卒于補陀

松江詩鈔參
鮑琦亭集

國朝

通容字費隱天童十二弟子之一來遊九峯閉關泗洲
塔院著五宗嚴統又嘗卓錫優曇庵慈門寺緇素重之

青浦
志

明照號守心結茆金山苦志梵行一夕有冶容婦欲破
其戒守心引刃以絕之由是檀施雲集建鎮海寺常騎

枯楊一株往來海濱祈雨輒有奇驗順治七年冬作書

別檀越念佛而逝

華亭志

常瑩字珂雪超果寺僧工山水與趙左齊名嘗爲董文敏倩筆朱彝尊詩所謂隱君趙左僧珂雪每替容臺應接忙是也順治初卓錫西郊之息庵陳忠裕公喜得禪友往還無閒後陳公殉節師始示寂云

松江詩鈔

宏歇字徹崖俗姓游黃州諸生從圓信于雲門晨夕問答直入其室圓信歿後擇余山居焉橡實鶉衣自安蕭寂順治丙申秋無疾而逝

青浦志

蜀僧行謚號二隱順治中說法於法忍寺後入嵎山

按曹

宗伯勲有送二隱入以疑事逮至浙江省城說偈坐化
嶧山詩縣志作此誤

偈曰昨日還家時未至今日還家正午時夢幻空花留

不住此心能有幾人知杭城官吏皆羅拜之

金山志

本月號旅庵寧波人宏覺禪師法嗣順治十六年入都
世祖章皇帝特賜樂天知命四字及一池荷葉衣無盡數
畝松花食有餘天上無雙月人間只一僧兩聯奉

旨入善果監院開法講席康熙元年還山駐錫郡之崑山
泗州塔院八年建寶奎閣敬奉

宸翰又擬種松于崑山之麓以爲十年之後可與蘇臺之
靈巖吳興之白雀竝峙乃所願未遂示疾而化董閬石

謂其賦詩作字皆無蔬筍氣也

松江詩鈔

本冲號息庵鄞縣楊氏子從天童宏覺禪師薙度順治十六年應

召入都仍留天童代理本院事後住楓涇圓明禪院康熙四十四年冲年八十有三

聖駕巡幸松江

特召奏對

賜圓明庵爲性覺寺後

賜淨域長齡扁及片石孤雲窺色相清池皓月照禪心水月比心清得真如諦松筠經歲久現長住身兩聯丙戌

秋沐浴趺坐而化世壽八十有四

嘉興府志參
松江詩鈔

宗渭字紺池華亭人少學詩于宋觀察琬尤侍講侗得

所傳授嘗謂詩貴有禪理勿入禪語宏秀選唐詩實詩

中之野狐禪也卽其議論可覘其品概

松江詩鈔
參別裁集

空江名能印青浦人住金澤鎮頤浩寺順治十四年至

禾中梵壽寺聽講法華經恍然有得康熙八年挂瓢石

湖兩載後歸本寺著有月山詩稿

松江
詩鈔

陳和尚周浦太平庵僧順治七年嘗取鱸灰給病者調

服輒愈已而不給撮坐閒土與之亦愈旬日坐閒土陷

成井汲泉應之亦驗巡撫土國寶虛其惑衆檄遷蘇州

北寺中求者如故或問何以愈疾則曰和尚不知人信之卽與之耳十年夏至冬亢旱二百餘日里人請濬周浦塘心力弗協和尚乃募化銀一千餘兩獨開茅柴港九百餘丈工始竣事載王鑄濬周浦塘碑記

南漚志

趙道人不知其名居一團素以耕漁爲業順治初年三十餘削髮爲頭陀就居旁編草爲棚坐臥飲食其中妻子勸之出不應或終日不舉火康熙初遠近聞而造謁者但以箸畫水爲字偶爲人言有奇驗駐防副將周徒步訪之不一語餽以銀米不受棚內僅容二人夏不熱冬不寒不熱香而自無穢氣

南漚志參閱世編

淨子不知何許人時稱空幻時稱寄癡順治初寓上海浦濱顧氏喜以左手運筆作行草極工後終於上海或

曰毘陵諸生而逃于禪者

上海志

一粟庵僧佚其名不解文字惟竟夕趺坐不寐一日語其徒曰夜來聞鬪聲不出庵境跡之有龜蛇竝鬪死於庵後池畔示寂後焚其龕背脊中皆舍利云

上海志

元璟字借山平湖人嘗寓超果寺西來堂著有完玉堂集康熙四十二年以詩受知於

聖祖仁皇帝初受業于華亭翁贊園其詩派本出雲間後與松江諸名士倡和其集亦郡人所刻蓋亦佛氏之所

謂因緣也

松江詩鈔

戒聞字解三華亭人客遊都中工山水倣元人法風格

清逸詩文亦佳其款託名姜容莫測其意豈曰戒聞而

懼令聞之彰歟

婁縣志參畫徵錄

天則和尚佚其名王光承序其詩集云在元則爲道林

在臨池則爲懷素在畫苑則爲日觀又不獨以詩名也

惜其詩不可復得韓友一亦賦詩贈之

漱芳齋詩話

呱呱和尚名已幻字三三不知何許人往來江浙至松

江與蕭中素王玠石喻非指三人善嘗挈觴坐高峯頂

痛飲放歌醉則大哭而反人莫測其蹤跡也

留溪外傳

撞鐘和尚佚其名毘陵人住超果寺雨花殿能詩沒後
詩稿失去僅存斷句云不雨秋偏爽凌霜菊自佳江流
神禹跡海見魯連心至空餘煙水千秋想賸有荒寒五
夜心其過釣臺句也

松江詩鈔

本瀛號神山上海徐氏子父仲雍母金氏兄弟四人次
天竺神山其季也少孤隨天竺雜度于箬庵和尚參請
宏覺大師于天童居吳江之疏溪草庵數年兩兄之在
家者相繼沒迎母庵居製僧帽鬻之以供朝夕母亦精
修淨業先知去期誦佛而化時天竺以出世開法師益
自激厲再謁天童聞雷有省後主講湖之道場山天竺

亦開法于杭州之南澗鎮江之夾山二三百里刹竿相望激揚宗旨更倡迭酬諸方咸歎羨焉康熙甲戌春同天竺歸上海省墓天竺告寂師謂人天和尙旣去地和尙且繼之蓋自謂也八月中示微疾吉祥而逝世壽六十八僧臘四十二塔于道峯之左與宏覺大師堅固子及天竺衣鉢一塔而三穴焉吳江潘耒爲之銘

遂初堂集

自扁字道開長洲人結廬虎邱山塘畫宗宋元人法多

意外趣亦能詩嘗寓松之普照寺

畫徵錄參松江詩鈔

淨斯字百餘南陽谷氏子傳洞山宗因參叩弁山瑞白聞鐘得悟年三十七開堂青龍隆福寺八坐名藍九會

說法臨終書偈云生年五十復零六大事因緣今已足

釣罷金鱗歸去休漁翁不向蘆灣宿

青浦志

元壠字牧堂華亭人俗姓李自云李妻姪住持瑞應禪院康熙癸未乙酉兩次

南巡接

駕前後應

制詩俱稱

旨賜禪定寺額般若相扁總看千佛出世曾無一法與人

對聯及

御書扇

上寫幸崑山詩

竝刻

奏對錄以紀榮遇焉

松江詩鈔

世鑑字白峯青浦人俗姓褚徑山松源房僧也詩畫有稱於時康熙中游京師挂錫大樹庵四十四年

聖駕南巡

召見奏對稱

旨敕賜香雲禪寺額著有耕餘詩草

餘杭縣志

明穹字蒼庵俗姓吳華亭張堰人授書如宿讀祝髮旃檀林堅持戒行王文恭延主超果寺康熙乙酉丁亥

聖駕南巡幸松兩次迎

鑾賦詩

上呼爲老實和尚

賜超果講寺額台宗闡教扁年七十餘豫知時至說偈而

化

奉賢志參
松江詩鈔

本源號兀庵湖州人宏覺禪師法嗣雲游至松駐錫于
青林禪院苦志焚修院旁產五色芝數本人咸異之著
有儕鶴集院後骨塔存焉

奉賢志

濟志字慧峯華亭人烈愍孫士美孫年十五忽朗吟云
重著袈裟猶是幻那堪回步入紅塵其父曰孤雲野鶴
非世網所羈遂依牯道人薙髮尋參澈大師於慧日深
入堂奧徧歷萬峯武康石湖釣灘諸山康熙五十九年
自作封龕封塔偈無疾而化其詩縱橫疏宕著有鶴山

外錄

王時鳩塔銘

楚琛字青壁華亭人從珂雪師薙度隨天童密公受具戒歸超果西來堂閉門養道善畫工詩

橐庵金澤頤浩寺僧與吳江毛錫年潘耒結方外交著

子山語錄潘耒銘其塔

遂初堂集

珂月爲人有智略殆類慧足者嘗構一室顏曰來庵朝夕焚修不履戶外里中目爲清淨僧

奉賢志

興漱號犀照宏覺禪師弟子也俗姓劉江右甲族具宿根善豁悟工書能詩著有晶溪集語錄初住江州能仁寺後游上海住鐸庵還山作偈曰我從無生來還向無

生去去來相亦無豈向無生住投筆而化

上海志參
松江詩鈔

上晏號雪松居鐸庵時面壁工詩不屑屑作釋子語忽

向人曰某日吾當去幸一別屆期衆善信環集問訊畢

兀坐示寂咸歎異焉

上海志

了緣衛城人值大水漲了緣溺得不死歎曰已往之年

天賜也遂削髮爲頭陀持瓢笠下湖湘縱游訪名僧歸

而屏居荒寺忽有豔婦入室不知所自緣曰道所以不

成者欲亂之也吾其好道未誠乎由是焚香于頂涅佛

於膚以艱苦修持終

金山志

桃源道人本漕船水手也康熙三十一年至朱涇披髮

爲頭陀冬夏一破衲口稱佛號聲如洪鐘每飯需米四五升但嚼生菜市人厭惡競持械驅之躍入萬安橋水中忽從西岸合掌而立衆始異之夜寢掘土窟日出必東向跪拜口誦無大二字日落亦如之後不知所之

志

離言悟生庵僧也爲費隱禪師法嗣兩主南禪寺移錫

超果著有離言語錄

婁志

潮音名通旭華亭俞氏子童時每遇食以手擊木作梆聲曰吾集衆以會食耳父母驗其不凡乃送歸普陀旃檀庵薙染稟戒於白龍慧鏡禪師徧參海內名席隨侍

嘯堂寒泉二老悉入堂奧康熙庚午主普陀院事德業

聞望煥然中興有全錄行世

普陀山志

古心名明忘上海陸氏子首謁金壇兀庵禪師發明心
要得法于潮音禪師康熙戊寅繼席普陀次年

聖祖仁皇帝南巡明忘至武林迎

駕蒙

御書普濟禪寺及皓月禪心四字并

賜帑金時同院照音字巨然亦松江人爲禪林尊宿

普陀山志

明照字漏雲吳江人翰林陳沂震次子當家難時逸出
侍文覺禪師晚住上海鐸庵戒律精苦兼工詩畫其壻

某持節浙中邀之不往也荒村託鉢嘗署其室曰往事已遙無可說此身猶在敢忘修著有詩草二卷

上海志參松江

詩鈔

通證字超澄號語石羅姓父眉山以畫名三吳證祝髮圓津禪院禪誦之暇亦以畫自娛王太常時敏扁其居曰墨花禪山陰高士戴易贈詩曰松雪楊林喚鳥頻雲林老去不逢人卽今留得殘山在何日圓津一問津王原祁詩云初地工夫學巨然清谿灌木起雲煙廿年精進頭陀老可入米家書畫船其推挹如此

青浦志

達真字簡庵姓楊氏內閣學士瑄之叔受度于超果寺

居西來堂後居廣富林之福城庵戒律精嚴兼工書畫
戶部尙書王鴻緒以其畫扇進呈

聖祖仁皇帝稱善於是四方爭購之雍正六年世壽七十
有四忽諭徒衆曰明午吾當逝矣衆問師何往答曰吾
家自有通霄路不向他人行處行至期檀信雲集沐浴
更衣向衆作禮而化

青浦志

癡和尚號解拈俗姓何郡人出家崇福庵不持戒律與
之酒肉卽大嚼其拒之者多不吉夜拄杖而立脇不至
席語多奇中康熙中旱師言雨在井底及雨乃井日後
一日也雍正十二年入都

召見以癲狀放歸後化去林太常豫仲挽之云不失嬰兒

意何知

天子尊慈悲時作戲透漏有微言

婁志參松江詩鈔

雪田佚其名蘇州鳳巢庵廣及法嗣二十一歲得法諸

方世稱鳳凰兒焦徵士袁熹晚修淨土與之結契往來

松江嘗緘一無字寄徵士以示心印著有松谿集

漱芳齋詩

話

八和尚涇縣人出家郡之西禪寺虔禮華嚴徹夜不眠

飢食柏葉周比部吉士訪之叩其所養答曰精足不思

慾氣足不思食神足不思眠其妻亦終身不嫁焚修郡

西蘭若庵

松江詩鈔

彌字大淵瑞應院僧大闢宗旨戒行修潔沈太常宗敬王翰林楨皆敬禮之一日徧邀所知謂曰衲將西歸特與諸檀越一訣請從此辭沐浴端坐合掌而化

大銓字際謹號棹旋居龍門寺聽雪廬初爲打飯僧晚忽工繪能詩殆所謂浮屠人多幻者其自題畫蘭云樵夫無路入靄靄空山春蘭蕙自相語毋以香媚人

松江詩鈔

徹源本浙人習青鳥書兼通數嘗主禮塔院作札固封上題某年月日開看屆期有僧實如募修塔院啟其札則曰塔于某年當圯某年重新并載首捐者姓名實如

名寄舟張文敏照稱其書亦工畫

集志

明博字以文挂錫竹岡靈芝庵言笑不苟惟務真實知府汪公德馨贈以眞印禪宗扁額世壽九十有三豫知

時至辭衆而化

奉賢志

物成名化霖姓趙氏世居南滙張江柵年二十出家天台方廣寺齊侍郎召南謂早得禪悟者惟物成爲最輯

天台山志大學士稽璜序之梓行

南滙志

實源初名三友居白鶴江投來青閣爲僧好畫梅因自號梅花船子張文敏照延主橫雲別業適鑿井有甘泉之應更名一泉後主福巖花山乾隆十六年

高宗純皇帝南巡巡梅花長卷

上嘉之北至京尋住保定蓮花寺久之入滅

青浦志

晉道

葛元字孝先吳人初從左慈受九丹液仙經徧歷名山修煉大丹丹成得仙號葛仙翁每飲酒則入陂水中臥竟日乃出曾從吳王船行至三江口阻風船多漂沒仙翁船亦沈于松江不知所在吳王歎曰仙翁有道何不能濟乃遣使求之忽見仙翁從水上行來衣履不濕面有酒色既見言曰臣從伍子胥邀飲耳

陳志

按舊志古跡載五色泉葛蓬墩俱係葛仙遺跡則陳志所引不盡無稽郭志刪去今補列

唐

王可交蘇州華亭人也以耕釣爲業居松江趙屯村一日
櫂舟入江方擊楫高歌忽見彩舫流于中流侍從甚都
中有道士七人呼可交上舫視之曰骨相合仙生於凡
賤眉間已灸破矣一人於筵上令侍者傾酒飲之再三
瀉而酒不出道士曰命也與二栗食之甘如飴命黃衣
送上岸覓所乘舟不可得但覺風水林木之聲開眼峯
巒重疊松柏參天乃在天台瀑布寺前僧迎問之曰今
早離家蓋三月三日僧言九月九日已半年餘矣僧設
食可交厭聞食氣自後絕穀挈妻子入四明山不復出

雲間志引
續仙傳

查道人名玉成在衛城東北遮山學道相傳飛昇于此山

因以查爲名至今浴丹井煉丹室猶存

金山志

沈義者吳郡人學道于蜀中能消災治病義子歸卓孔寧家于華亭谷與妻賈共載詣之還逢白鹿青龍白虎車各一乘從者皆數十騎朱衣仗矛帶劍輝赫滿道問義曰君是沈義否沈愕然答曰是也騎人曰若有功于民心不忘道黃老今遣仙官來下迎須臾有三仙人羽衣持節以白玉簡青玉介丹玉字授義義不能識遂載之昇天時道間鋤耘人皆見忽大霧霧解失其所在後四

百餘年忽還鄉里推求得數世孫名懷喜曰聞先人說家有先人仙去久不歸也

陳志引
神人志

宋

清音子姓湯名道亨復自號赤腳道人宋季引一猱云自金陵來處茅椒于府北猱大如人能主給使亨夜坐時舒光邦人推異爭飯之豐薄不謝第言分定去由是愈益異之施與日多因構庵以居名曰太古以延竚四方雲水之客久之有軍士戲烹其猱亨卽咨嘆與所親訣別作偈曰八十一年饒舌終日化緣不歇重陽時節歸家一路清風明月遂端居而化

陳志

元

塊北子姓蔣號清谷年二十五涉獵經史言辭簡邃擊首
垢面動靜不羈元至正初抵松江坐太古園室已則歷
市廛佯狂人呼爲風子一夕叩府人沈蒲團門且告之
曰將蒲團來坐我沈異之攜一蒲團導詣蔬圃草蓬中
晏坐沈徐暱久之有所省發輒委俗傾身服役爲弟子
由是四方崇尚爭施與因以其地爲庵卽所號爲額融
然一室足不踰閭者三年嘗有問者曰近思錄定然後
始有光明是金丹否蔣曰賢且去味中庸又嘗手詩示
沈云萬紫千紅總是春何須饒舌問東君啞人得夢向

誰說豎起空拳指白雲又云不偏不倚立于中不著西
邊不著東超出東西南北外一毫頭上釣蒼龍一日進
沈曰吾乘化盡矣若等勉之言絕而蛻顧志

明

彭宏大法名通微號素雲河南汝陽人母夢一黃冠授大
桃食之而有妊元大德十一年二月十五日生年十二
事劉月淵爲師稍長遊武當山時太和張真人主紫霄
宮素雲執役三年始授以鍊氣棲神之旨走蜀上青城
入閩登武夷凡古仙過化處歷覽殆徧洪武十四年始
至細林山結茅居之細林一名辰山以真人有逢辰卽

棲之授記也二十七年秋八月二十一日清晨啟關沐浴更衣趺坐語徒輩曰吾將返我真又曰九天之上無不忠不孝神仙今人人倫未盡欲修仙佛蒸沙作飯豈不遠哉乃舉筆書偈曰九十韶光一度春由來幻法已非真玉音漫說追空相金紫羞將潤色身已見聖朝新氣象休疑海外舊風塵於今解脫縈纏去萬仞峯頭月一輪書畢問左右曰何時曰正中遂泊然而逝是年十月太祖命中使鄭承恩入山宣召以羽化聞越月復遣中使入山啟窆視之正身不倚長爪繞身命有司發以輓石繚以垣墻賜號明真子相傳其爪乘風化爲金蛇

似蜥蜴而無足長三四寸今辰山猶有之取置器中俄

失所在

郭志

郭得全者義士夏椿之甥也學博志高因母族夏氏墓在辰山卽于本山度爲道士遇彭真人邀入草堂遂具香燭告山靈以師禮事之真人化後得全守其墓以奉香

火焉

陳志彭真人傳內采入

白鶴仙人不知何代人洪武初館于華亭俞彥達顯家術甚神顯之子允少好方術見而異之請學其技道士曰子有奇氣當奉大對爲天子命吏是不足學允遂折節讀書以春秋第三人登進士官禮部主事謫長沙判未

至暴卒七日矣忽有一醫者至取青囊一粒納之口中
有頃嘔數聲而甦家人大喜競以金帛酬之不受曰昔
嘗館于其家我故人也叩其姓名第曰長沙有白鶴大
仙廟盍往修之乃知少所遇者白鶴仙云

陳志

終南山人不詳其姓字正德初馬二游松江遇一方士盤
桓日久自稱終南山人或叩山中事答曰山內自一乾
坤服食與世無殊無是非爾我之心壽皆百數十歲動
用俱備所乏者鹽耳山西南有一洞四川境也水湧難
進欲入者必飛石于洞頂上有人問其繇則牖水使進
也山中有至人知天地國家之祥異今朝廷有事令我

輩十餘人出游引好人去子心亦善去彼至樂且壽如國初宋景濂方死數十年耳馬二不能從其人卽隱不

見

陳志引七
修類纂

貧極道人年可三十餘面赭色日披髮走市中能以稻草心作筆爲署書府學博士某離家甚遠思得近地一官以事母一日乘輿出貧極撫其肩曰而佳音至矣待信至我當自來一日晨往謂日報者已在西關外遣人偵之果如其言喜甚酬以金帛皆不受後不知所之

陳志

朱蒲包者上海沈氏僕也十八爲寶山募兵遇異人授藥一丸服之腹中熱氣全湧遂不覺寒暑飢渴衣破衲冒

以蒲包與之酒飲輒醉醉輒笑呼當街臥人呼爲蒲包
仙行必挾四竿竹夜宿則植竹于途不施苫蓋大雨無
沾濕霜雪裂膚鼻息麝如也市人釀酒敗朱挾竹攪甕
輒變爲甘夏月裸坐赤日中不浴而淨冬月河冰合以
竹敲冰冰輒解裸坐水底振衣而起平生不爲人談禍
福無意吐一語必奇中有兄弟不睦者微服訪之約爲
方外兄弟朱瞠目良久曰自家兄弟安在與別人結兄
弟耶又問身壽幾何朱曰來日便是去日抵家而化陳志
劉黑黑山東人萬厯壬寅自泰州至蘇郡衣冠極倣時啖
生魚狀若風狂人因目爲垢仙坐華陽香花橋八年無

閒寒暑風雪夜臥氣蒸汗流華亭朱太常國盛中年無子持信香祈嗣黑黑贈橘二枚後果生二子一日坐于柳灘上衆挽之黑黑折蘆掠水而去

蘇州府志

徐崑璣字完玉華亭南橋人膂力過人好騎射擊劍明季辭母走京師所附舟乃內監也一鳥決起崑璣矢發而鳥墜內監奇之欲致門下恥與相附抵都遂辭去聞毛文龍頗納士往投焉毛試其技深器之然貴倨無待士禮崑璣心弗善也以母老辭歸是歲督學宗公以騎射論策拔冠一軍嘗有出世志適遇異人授以方書并吐納修煉之法閒以丹藥療人無弗愈者遂住真武祠更

名元嶼自號斷山年八十九端坐說偈而化

奉賢志

魯志剛字雲陽簡肅後裔善飲盛暑或衣綿絮遇霜雪則常赤體至人家索酒言禍福奇中引之坐輒倒挂椅間或抱兩膝旋滾地上其疾如風倒挂大樹枝上風吹搖曳以爲樂又能于城上聳身上下飛走雉堞頃刻周四門人皆呼爲魯癡一日綰雙髻嬉遊朱涇市中兒童輩輩隨之相與嬉笑皆不測爲何如人也

金山志參
嘉興府志

跛道人姓謝佚其名住郡之東嶽廟善咒水術凡患瘡疥者往叩之取池水咒而敷之立愈化後塑其像于泉側

俗呼爲水仙祠

懽齋考
異錄

國朝

楊鶴亭字開先號汀石本名家子生時有白鶴翔集因以爲名明季出家郡之東嶽廟東房日誦道德黃庭參同契諸書得異術于跛道人試無不驗凡病者遠近爭赴活人甚多人皆呼楊仙翁康熙甲寅沐浴更衣端坐而逝

詹維靜字怡陽揚州人年四十八棄家學道徧歷名山遇純陽真人于武當山授金丹大道過辰山崇真道院居點易臺年七十而有少容後示化于茅山乾元觀

清浦志

顧源本川沙人俗稱顧爛頭海濱網得石匣中有異書披之盡得其祕會大旱邑令延至祈無不應後大風雨旋失異書及柩所在

南匯志

周望字渭徵號綸仙居金山衛城鎮海門隱于黃冠著有樵唱軒稿長於駢體其詩入宋人之室

松江詩鈔

沈清正字默夫號一誠爲道士後號蟾陽子清正緇襟而孤母倪誓死守節前母兄無行利母再醮誘往普陀進香將鬻于海舶母覺投海死其兄遁不返清正育于母族稍長稔其事刺血寫疏禱于天冀得母尸嘗宿一古廟夢神告以母在金塘島遂浮海渡蛟門泊一島問

其名果金塘也訪居人有告以某年曾瘞一投水婦示其處清正露宿其旁夢母慘容泣下呼清正小名清正哭而醒憶念音容與得之母族者肖乃負骨歸葬父墓清正尋母尸徧厯沿海諸郡遭颶風舟幾覆出門三年水陸數千里終以痛母故出家著有鷗亭詩稿松江詩鈔近購得殘藁三冊其康熙丙申遊楚丁酉游豫戊戌入都有宿

御書館及出古北口至熱河召對等作惜未詳其何緣遭際也丁未在松至杭嘉庚戌年六十遊天台其梗概如此

楊仁瑜字士升號靜庵華亭人世業儒聞崑山陳明菴得薩真入遺術遂師事之康熙三十二年松郡大旱知

府龔嶸請禱應時雨注三十三年赴豫救旱治河禱雪
歷有奇驗巡撫顧汧奉百金爲壽辭不獲卽於其地建
斗閣河道周銓勒碑記之三十八年及五十三年松郡
大旱皆應禱立沛姪全德字夔音少孤事母孝幼侍仁
瑜得其傳

史肇元號復初鎮江人母陳氏夢武當神授以桃吞之
有妊及長從句曲楊猶龍游盡得其術康熙中泗涇有
朱姓婦爲邪祟延至家建壇誦咒空中大震擊碎五通
神廟患卽安遂居婁以道法濟世卒年七十七

婁志

周端揆世爲金山衛指揮父王如磐石衛經歷明季兵

亂率妻子守城度不支同赴水死端揆隻身飄泊遇異人授以符籙禱雨驅邪治病其應如響晚居崇真道院無疾而化

青浦志

周維新字邠裔神山王姓子周端揆撫育之因冒其姓旣長願出家慕何宏士道法從之游盡得其蘊康熙三十六年夏大旱祈雨立降給事中王原延主玉皇閣道風大扇遠近邪魔幽隱之疾治之神效有致餽者儲之一器重建祠宇名萬壽道院置田七十畝爲常住齋糧臨終囑其徒劉敏曰用志不紛乃凝于神三教無異道也不飲食二十餘日而化敏字坤培亦以道法稱于時

兼工詩畫

青浦志

曹昉字耕雲居神山能詩喜藏書不苟言笑道風高邁

周茂源張大受王原皆敬禮之

青浦志

鄒半仙衛城人出家上真堂以焚修爲事長于六壬與
閣學楊瑄友善瑄戍瀋陽時所言皆奇中一日乘餉船
之郡中途風浪大作舟不進鄒曰兵餉不可遲作法乘
逆風行瞬息抵郡人稱爲鄒半仙

何科濂字處默華亭人康熙間出家亭林栖霞道院恬
靜寡言虔心奉斗會海上大旱祈禱逾月罔應胡年屆
九旬葛巾芒屨走詣帥府遂請登壇胡令壇下積薪誓

今日不雨願燼其身是日果甘雨如注不別帥府而歸
餽遺亦卻遂親叩其廬贈以維誠格天額年九十餘無
疾而化

邱從高字天山得楊鶴亭祕傳符籙又遇周大經授以
五雷玉笈等書凡病邪祟者治之卽除生平祈雨十三
壇皆神應雍正十年夏河水忽鹹傷禾稼總理江南塘
務太僕寺卿俞兆岳親詣問焉邱瞑目少頃曰此妖魚
爲患耳以鐵牌鎮之潮水卽淡俞書誠通帝座法力神
通二額以獎其功乾隆辛酉告衆而化輕若蟬蛻

婁近垣號朗齋楓涇人出家仁濟道院游龍虎山事三

華院道官周大經授以五雷法雍正五年入都

上嘉其禮斗誠恪授上清官四品提點欽安殿住持鑄印
賜之十一年

詔封妙正真人

賜字曰三臣乾隆初遇

覃恩封祖父皆三品坦道行益高凡祈禱厭効屢著奇驗
雅尚沖澹大耋而有少容四十一年正月辟穀數日端
坐而化時年八十有九

賜金治喪

命葬龍虎山從其志也

婁志參于文襄墓誌銘

金溪遠字武瞻號漱芳得邱從高之傳雍正初婁近垣同至京師薦直正大光明殿講演經義咸稱

旨焉

王雋望字聲萬受正一符籙學禹步飛行考召之術禱雨治魅皆有驗重建谷水道院院創于宋寶慶丙戌重建爲乾隆丙戌詳沈大成碑記其沒也大成志其墓

學福

集齋

顧真誠字夢雲號一鶴上海人從楊全德游遂明先天之數所藏皆有驗晚棲蓮溪道院究心易理折衷來氏之學著有易學拾補六卷

終